



গুম হওয়া ছাত্রদল নেতা দিনারের বোনকে সংরক্ষিত আসনে দেখতে চায় সিলেটবাসী



ছবি: লেন্স এশিয়া

সিলেটের গুম হওয়া ছাত্রদল নেতা ইফতেখার আহমদ দিনারের বোন তাহসিন শারমিন তামান্নাকে জাতীয় সংসদের সংরক্ষিত নারী আসনে দেখতে আগ্রহী অনেকেই। দীর্ঘদিন ধরে ভাইয়ের সন্ধানের দাবিতে আন্দোলনে সক্রিয় থাকা তামান্না ইতোমধ্যে সিলেটবাসীর কাছে পরিচিত একটি নাম। ২০১২ সালের ৩ এপ্রিল নিখোঁজ হন ছাত্রদল নেতা দিনার। এরপর থেকে তার কোনো সন্ধান মেলেনি। ভাইকে ফিরে পাওয়ার দাবিতে শুরু থেকেই সোচ্চার তামান্না। পরিবারের ওপর নেমে আসে গভীর শোকের ছায়া। পিতা ডা. মঈন উদ্দিন আহমদ, যিনি সিলেট স্বাস্থ্য অধিদপ্তরের বিভাগীয় পরিচালক ছিলেন, সন্তান হারানোর বেদনা বয়ে শেষ পর্যন্ত ইন্তেকাল করেন। মাও পুত্রশোকে অসুস্থ হয়ে পড়েন। বর্তমানে তামান্না সিলেট মহিলাদলের ভারপ্রাপ্ত সভাপতির দায়িত্বে আছেন। বিভিন্ন আন্দোলন-সংগ্রামে তার সক্রিয় উপস্থিতি রয়েছে। রাজনৈতিক চাপ ও নজরদারির মধ্যেও তিনি পিছিয়ে যাননি। সর্বশেষ জাতীয় সংসদ নির্বাচনে সিলেটের পাঁচটি আসনে দলীয় প্রার্থীদের পক্ষে কাজ করেছেন তিনি। পরিবার থেকে পাওয়া মূল্যবোধ ও রাজনৈতিক অঙ্গীকারে দৃঢ় তামান্নাকে অনেকেই স্পষ্টভাষী ও সাহসী নেতৃত্ব হিসেবে দেখছেন। স্থানীয় পর্যায়ে মানুষের সুখ-দুঃখে পাশে থাকার কারণে তার গ্রহণযোগ্যতাও বেড়েছে বলে মত রাজনৈতিক বিশ্লেষকদের। সংরক্ষিত নারী আসনে সম্ভাব্য প্রার্থী হিসেবে সিলেটজুড়ে তার নাম আলোচনায় রয়েছে।